



F A C T V M

Du proces pendant au grand Conseil du Roy.


Entre Messire Jean Vallet Preuost de la Preuosté de Vertou Diocese de Nantes en Bretagne: & Me Pierre le Ber demandeur en requeste par luy présentée aux requestes du Palais à Paris, le iour du mois d'Apuril 1604. & encores demandeur en execution d'arrest du dernier Septembre audit an 1604. & ledit Vallet defendeur a ladite requeste, & aussi demandeur en execution dudit arrest. Et encores entre ledit le Ber appellant comme d'abus du pretendu desny à luy fait en Cour de Rome de luy deliurer bulles de ladite Preuosté de Vertou, & ledit Vallet intimé: & encores entre ledit Vallet demandeur en requeste ciuille par luy obtenue contre certain arrest du conseil donné par surprise sur requeste présentée de la part dudit le Ber, sans ouir ledit Vallet, du 26 Mars dernier d'une part. & ledit le Ber defendeur a ladicte requeste ciuille d'autre.

IE fait est tel: que Maistre Michelle Ber viuant Chanoine de nostre Dame de Paris, Prieur de Ponts sur Seyne, & Preuost de la Preuosté ou Prieuré Conuentuel de saint Martin de Vertou Diocese de Nantes en Bretagne: estant tombé de dessus vn ieune cheual en retournant dudit Prieuré de Ponts à Paris au mois de Iuillet en l'an 1598. fut amené blessé & malade audit Paris.

Le 27. dudit mois estant sollicité par ses amys de resigner ses benefices, parce qu'il estoit vieux & caduc: passa trois procuratiōs ledit iour a resigner les fufdits trois benefices, sçauoir la prebende de Paris à Charles le Ber le ieune, le Prieuré de Ponts à Daniel Preuost, & ladite Preuosté de Vertou audit Maistre Pierre le Ber son nepueu.

Le 22. de Nouembre ensuiuant il s'apprend par les extraicts des registres de Maistre Pierre Lomedé banquier de Paris, que ledit feu Maistre Michelle Ber le chargea de deux desdictes procurations, sçauoir de celles de la prebende de Paris, & du prieuré de Ponts, & que le 16. Ianuier ensuiuant 1599. la datte en fut prise à Rome, & que le 6. Iuillet audit an apres la mort dudit le Ber ledit

A



Lomd  receut la signature de prouision de Rome de la dicte prebende, & celle dudit prieur  de Ponts le 22. dudit moys de Iuillet 1599. seulement ce qu'il plaira au conseil remarquer en passant.

Et quand a la procuracion a resigner ladicte Preuost  de Vertou en faueur dudit maistre Pierre le Ber, le registre dudit Lomd  ne s'en trouue charg , & ne s'apprend qu'elle est deuenue.

Les parties sont d'accord que ledit Maistre Michel le Ber deceda de mort subite le 9. iour du moys d'Apuril audit an 1599. qui estoit le Vendredy saint: & que par sa mort maistre Fran ois Vallet frere dudit Iean, fut pourueu   Rome de ladicte preuost  de Vertou, sans precedance, ou concurrence: estant vn benefice situ  en pays d'obedience comme est la Bretagne ou le Pape: qui est *Dominus beneficiorum*, se reserue huit moys en l'an, s auoir Ianuier, Februrier, Apuril, May, Iuillet, Aoust, Octobre, & Nouembre, *ad gratificandos pauperes Clericos, patria: & alios ro. cu. sequentes.* comme portent les regles de Chancellerie, publiees *die Crastina, assumptionis romanorum pontificum.* que ledit maistre Fran ois Vallet prist possession de ladicte preuost  de Vertou au moys de Iuin, & que ledit maistre Pierre le Ber s'y opposa comme il auoit fait a plusieurs autres prouueuz par mort, les vns par l'ordinaire, les autres c me estans n mez, & tenans le lieu & place de trois indultaires qui auoient requis a monsieur l'Abb  de Saint Iouin de marnes, ladicte preuost  de Vertou dont il est collateur ordinaire, & en sont les actes d'oppositions produites au proces.

Ledit le Ber s'opposoit en qualit  de resignataire de son oncle, & publioit par tout que sondit oncle luy auoit resign : & entre les autres s'adressa audit Vallet & luy dist qu'il auoit perdu & la peine & son huy le, d'auoir enuoy    Rome faire pouruoir son nece *per vnum*: puis que luy le Ber auoit bonne resignation, & sur cela le sollicitoit de traicter avec luy.

Il est vray qu'il luy confessa au moys de Iuin que ses Bulles estoient accroch es   Rome: parce qu'il n'auoit pas enuoy  la profession de foy faicte dans l'an: & qu'  Rome on ne les receuoit pas souuain es, d'autant que l'homme peut changer de religion dans vn an & moins.

Vallet luy dist qu'il ne pouuoit traicter ny concorder avec luy que cest accrochement ne fust leu : & luy conseilla de faire escrire au solliciteur de Rome, de donner son obligation   l'office de l'extension des dattes, de fournir vne profession de foy de le Ber faicte dans l'an, trois ou quatre moys apres: au moy  dequoy on luy pourroit relascher ses bulles, si elles n'estoient accroch es pour autre difficult  que pour celle la.

Le Ber sur cest aduis partit de Paris d'avec Vallet pour aller au Mans au commencement de Iuillet faire sa profession de foy deuant son Euesque, parce qu'autrement elle n'eust est  receu    Rome, & se promirent l'vn   l'autre de s'entre-escrire, ce qu'ils firent dont il sera parl  en son ordre.

Cependant le Ber fist tant par entremises de ses amis qu'il attira Vallet   vn Concordat de permutation de ladicte preuost  de Vertou, dont le Ber se disoit pourueu avec le prieur  de la Trinit  de Foulgeres.

Ce Concordat de permutation est de l'vnziesme iour d'Octobre 1599. six mois & plus apres la mort de Maistre Michel le Ber : & y a clause expresse qu'ils ne se feroient respectiuellement pouruoir en vertu des procurations de trois mois apres ledit concordat : cela alloit donc a l'x^{je} Ianuier 1600. deuant qu'ils peussent s'ayder des procurations l'un de l'autre.

Ce temps auoit esté pris par le Ber pour fournir & bailler a Vallet ses bulles bien & deuement expediees, prise de possession, insinuations, & lettres de capacité ayant stipulé par expres que s'il y auoit proces pour le tiltre, que Vallet le poursuyuroit sous le nom du Ber. Ce qu'il n'eust peu faire sans auoir ses prouisions, & pieces necessaires, tiltres, & capacitez.

Cependant le Ber qui estoit dès le commencement en mauuaise foy, de traicter avec Vallet de la recompence d'un benefice duquel il n'auoit tiltre ne semiltitre: Voulut persister en sa mauuaise foy iusques a la fin, & trôper Vallet.

Car dès le 15. dudit mois d'Octobre, quatre iours apres ledit concordat : au lieu d'attendre trois mois a se faire prouoir du prieuré de la Trinité, & deuant que d'auoir mis en main de Vallet ses tiltres & capacitez pour soustenir les proces contre les pourueuz par mort: Vallet a verifié que le Ber bailla sa procuration a maistre Pierre Lomedé pour la faire effectuer : ce qui fut fait à Rome dès le 15. de Nouembre ensuyuant.

Vallet aduertý de ceste perfidie de le Ber, qu'il trompoit, & qu'onques n'auoit esté pourueu de Vertou, ny la procuration de son oncle enuoyée à Rome, ny sa profession de foy, & que ce n'estoit que vent : fut conseillé de reuoker sa procuration a resigner son prieuré de la Trinité en faueur de le Ber.

Mais comme le Ber s'estoit caché, & absenté Vallet fut cōtraint d'enuoyer par courier expres sa procuration a reuoker à Rome: laquelle arriua bien à propos, car elle fut signifiée en chambre, & Chancellerie le 13. de Nouembre audit an 1599. & cependant le Ber ne laissa de se faire prouoir audit Rome dudit prieuré de la Trinité le 14. ou 15. dudit mois.

Depuis le Ber ayant eu honte de descouurir sa turpitude, est demeuré coy iusques au mois d'April 1604. sans parler de ce Concordat frauduleux plein de perfidie de sa part: qu'il s'est aduisé de presenter requeste aux requestes du Palais à Paris: sur laquelle est interuenu ledit arrest interlocutoire du dernier de Septembre audit an 1604. de l'exécution duquel arrest *nunc agitur*.

Pour retourner donc aux rescriptions, & lettres missiues de Vallet le Ber, en represente deux sur ce subiect, l'une est du dernier de Iuillet, & l'autre du dernier de Septembre audit an 1599. apres la mort de le Ber son oncle, & par la teneur desquelles lettres missiues dudit Vallet audit le Ber : il veut & pretend preuuer que Vallet a mis à Rome vn nichil transeat, aultrement vn empeschement en Cour de Rome: du viuant de son oncle tel que sa procuration a resigner n'a peu estre effectuée du viuant de son dit oncle.

Le Conseil faisant droit sur la requeste dudit le Ber du mois d'April audit an 1604. apres auoir veu lesdictes missiues dudit Vallet, & autres pretendues preuues, sur ce fait articulé par le Ber: à iugé, & ordonné par son arrest du dernier Septembre 1604. prononcé le 12. Feburier dernier, que deuant que faire

droict sur les instances des parties: que le Ber verifiera dans trois moys que ledit Vallera en Cour de Rome empesché du viuant de feu maistre Michel le Ber que sa procuration a resigner n'a peu estre effectuée du viuant dudit le Ber, & ledit Vallet au contraire si bon luy semble.

Voyla donc tout le proces reduit a la preuue d'un seul fait: & ores que Vallet n'eust autrement affaire d'entrer en la preuue de ceste negatiue. Toutefois d'autant que le Ber auoit articulé que ledit Lomedé banquier estoit celuy qui auoit receu la procuration de son oncle a resigner ladicte preuosté de Vertou a mesme iour, & enuoyé en cour de Rome par mesme voye & ordinaire que les procurations de la prebēde de Paris & prieuré de Ponts: & que de tous les trois benefices resignez en mesme iour: la datte auoit esté prise à Ferrare le 5. Septē- audit an 1599. & les expéditions des autres deux benefices faictes dudit iour & datte: du viuant du defunt, & que celle de Vertou eust esté faite du viuāt dudit defunt à la sollicitation dudit Lomedé banquier, tout ainsi que les autres, sinō l'empeschement que Vallet y auoit mis disoit le Ber: Ledit Vallet presenta sa requeste au conseil, dans le delay de trois mois pour faire son enqueste: à quoy le Ber s'opposa.

Cela fut renuoyé à l'audience par monsieur le commissaire rapporteur du proces: & par arrest contradictoirement donné, ou le Ber empeschoit formellement que son banquier Lomedé fust ouy, estant disoit-il son conseil, fut ordonné que Vallet feroit ouyr telles personnes que bon luy sembleroit sur le fait coarcté par l'arrest seulement.

En ceste audience le Ber demanda par requeste verbale estre receu pour appellant comme d'abus du desny qu'il dit luy auoir esté fait de luy deliurer ses bulles en Cour de Rome.

Le conseil le receut appellant comme d'abus, & ordonna que les parties escriroient & produiroient sur ledit appel comme d'abus.

Le Ber peu de iours apres s'aduifa d'une finesse, & vsa de surprise, car sans ouir Vallet, il obtint arrest sur requeste par luy presentee: par lequel arrest il est mandé à monsieur le Chancelier de l'vniuersité de Paris de donner vne prouision à le Ber laquelle luy vaudra du 5. Septembre sur la datte prise.

Contre cest arrest nouuellement venu a congnoissance de Vallet, il s'est prouueu par requeste ciuile.

Voyla donc trois instances a iuger. La premiere est la preuue que le Ber doit auoir faicte du fait par luy articulé & coarcté par l'arrest, & les preuues contraires faictes par Vallet qui se trouuēt au proces, ayant fait ouir ledit Lomedé banquier en execution d'arrest. La seconde instance est l'appel comme d'abus interieté par le Ber: & la troisieme & derniere est la requeste ciuile obtenue & presentée contre l'arrest obtenu par surprise sur requeste presentée par le Ber sans ouir ledit Vallet.

Par tout ce que le Ber a escript & produit sur la preuue dudit fait par luy articulé par l'arrest: il ne verifie en aucune façon comme il ne peut faire, que Vallet aye mis aucun empeschement en Cour de Rome du viuant de feu maistre Michel le Ber que sa procuration a resigner n'ayt peu estre effectuée du viuant dudit defunt.

Ettant

Et tant s'en faut qu'il verifie le dit fait, qu'il n'a peu verifier que ladite procuration & la profession de foy aient iamais esté enuoyees en Cour de Rome, ny a Ferrare, soit du viuant, soit apres la mort de son oncle, & que suricelle procuration la datte ayt esté retenue a Ferrare comme il pretend le 5. de Septembre 1598. & comme il le suppose.

Toutefois ceste preuue luy seroit facile a faire s'il y auoit de la verité audit fait, car premierement il apporteroit facilement les extraicts de Lomedé banquier comme il auroit receu ladicte procuration & enuoye à Rome : les extraicts du registre de Bothereau solliciteur & banquier audit Rome, respondant dudit Lomedé qui seroient foy du iour de la reception de ladicte procuration, il apporteroit encores les extraicts des registres du notaire de châtre, ou Chancellerie de Rome: comme le iour de l'arriuee du courrier, & le mesme iour de la pretendue datte, il auroit receu ladicte procuration: ou a tout le moins appprteroit ladicte procuration cottée du solliciteur de Rome du iour qu'il la receuë, & du notaire qui preste le consens toutes choses necessaires deuant qu'on puisse à Rome asséurer vne datte valable: suuant les Edicts & ordonnances de ce Royaume, arrests des Cours souueraines, regles de Chancellerie de Rome, & ordonnances du sainct Pere.

Mais de tout cela le Ber ne fait aucune preuue: il apporte seulement vn extraict qu'il a fait à Rome: que Vallet supplie treshumblement le conseil de voir & bien considerer.

En cest extraict se trouuent trois actes escripts sur mesme registre & faicts a diuers temps, comme il est facile a iuger par les dattes & par les propres termes desdits actes.

Le premier est vne datte du 5. Septembre 1598. *pro petro* le Ber sur la preuosté de Vertou vacante par resignation de Michelle Ber.

Le second est vne extension escripte en marge de ladite datte du 27. Aoust 1599. apres la mort de le Ber.

Le troisieme est vn nichil transeat en marge de ladicte extension du 27. Aoust. pour empescher dit il, ou retarder l'expedition de ladite extension: qui sont les mesmes mots fort remarquables.

Et voyci ce qui est escrit en ceste piece produite par le Ber des extraicts faicts à Rome, ou il n'est fait mention, ny pres ny loin de maistre Iean Vallet.

Quia omnia & singula per iam dictum & infra scriptum nostrum notarium, in eorundem dominorum petri eschimar d procuratoris & testium infra scriptorum presentia, ex predictis respectiue libris extrahi, exemplari, & transumptari: ac in hanc publicam extractus, exempli, vt transumpti formam redigi fecimus, & mandauimus. Quorum omnium tenores successiue sequuntur & sunt tales, videlicet. & primo tenor supra dictae datae super prioratu conuentuali seu prepositura sancti Martini de Vertou per cessionem Michaelis le Ber in fauorem Petri le Ber Capta talis est videlicet.

Datum Ferrariae nonis Septembris, anno septimo Petri le Ber super prioratu Conuentuali seu prepositura sancti Martini de Vertou ordinis sancti Benedicti nanneten. Diocesis per cessionem Michaelis etiam le Ber.

In cuius datae margine illius extensio annotata reperitur sub his verbis. extensa vi-

gesima septima aug. milefimo quingentesimo nonagesimo nono. Tenor vero supradicti nichil transeat pro supradicta data extensione, ut expeditione impedienda siue retardanda, ut prefertur porrecti, talis est, videlicet.

Nichil transeat super prioratu Consuetuali seu prepositura Ecclesia sancti Martini de Vertou, ordinis sancti Benedicti Nannetensis Diocesis, per cessionem Michaelis le Ber vacante.

Par ledit extraict le conseil voit qu'il y a vne datte à Ferraire du 5. Septembre, mais il ne voit point que la procuration a resigner ayt esté enuoyee, & que la datte ait esté estendue dans les six mois suyuant les Edicts & ordonnances de la France, ergo ceste datte est nulle, & n'a esté prise avec puissance du resignant de son viuant.

Cela se verifie par le second acte qui est vne extension à la marge de ladite datte du 27. Aoust 1599. Apres que le resignant estoit mort des le 9. Apuril precedent, & par le troisieme acte qui est vn *nichil transeat*, qu'il faut necessairement qu'il ayt esté mis apres le iour del'extension du 27. Aoust: & non sur la datte du 5. Septembre 1598. la raison est qu'il n'est pas mis entre ladite datte du 5. Septembre & l'extension du 27. Aoust, mais en marge de l'extension & est dit. *pro supradicta data extensione, & expeditione impedienda siue retardanda.*

Cela est si clair qu'il ne reçoit aucune difficulté ou interpretation.

Toutesfois Vallet qui a pratiqué en Cour de Rome desire bien faire entendre quelque chose au Conseil (s'il luy plaist) de la pratique & forme des dattes, suppliant tres-humblement iceluy Conseil qu'au cas qu'il en doutast d'appeler, & faire ouyr d'office quelques banquiers sur ce subject.

Il y a donc à Rome deux sortes de dattes: les vnes s'appellent dattes prises, & les autres dattes courantes, comme Vallet a plus amplement deduit par ses escritures.

Dattes prises sont du iour de l'arriuee du courrier, que le solliciteur apres auoir receu le paquet, & registré ses matieres sur son registre, s'en va trouuer le Commis de Monsieur le dattaire à l'office de l'extension des dattes, & luy presente vn liste contenant briefuement tous les benefices dont il desire datte, & ayant présenté ceste lyte en fueille Volante, s'en va trouuer vn Notaire de Chambre, ou de Chancellerie: & luy montre les procurations à resigner, au dos desquelles le solliciteur a escript le iour & l'heure de la reception.

Le Notaire à l'instant en fait vn brefregistre, & les paraphe, & les rend au solliciteur.

Cela fait le solliciteur poursuit son expedition selon qu'il en est pressé de la partie. Et pourueu qu'il demande l'expedition dans six mois, sa datte prise luy est conseruée pour le regard des benefices de France, & les prouisions dattes de la datte prise.

Mais si vn iour apres les six mois il va demander son expedition sur datte prise, elle luy sera desniee, & luy sera deliuree de datte courante seulement: c'est à dire du iour qui court apres les six mois, auquel iour le solliciteur presse & demande son expedition.

De ceste forme veritable & dont Vallet se remet volontiers au rapport des

banquiers, il est aysé à voir, & à iuger que le Ber n'a demandé son expedition que le 27. Aoust 1599. quatre mois apres la mort de son oncle, & treize mois apres sa procuration qui est du 27. Iuillet 1598. & que voulant leuer ses bulles, les officiers ayant recogneu que la procuration n'auoit esté receue a Rome du 5. Septembre 1598. quelle estoit souzrannee d'un mois entier, & qu'il n'auoit sa profession de foy faicte dans l'an, & d'ailleurs que le Ber estoit mort, & que François Vallet auoit esté pourueu par sa mort, ont peut estre mis, comme il est a croire ce nihil transeat *ex officio*, quoy que ce soit ce nihil transeat parroist auoir esté mis *post obitum*, & en iceluy n'est parlé ny pres ny loin de Vallet.

Mais le Ber dit que ce nihil transeat est *superprioratu conuentuali* de Vertou vacante *per resignationem Michaelis* le Ber, *ergo* il est abusif: car on ne doit empescher vne resignation.

Vallet a respondu par ses escritures qu'il n'est point autheur du nihil transeat, qn'il ne la mis, ne fait mettre: & ne le veut soustenir ne defendre. Toutes-fois il dira bié sans le soustenir que le Ber ayant negligé sa datte pretendue du 5. Septembre: & n'ayant eu que la datte courante du 27. Aoust 1599. & que la procuration n'ayant esté enuoyee, & ne se trouuât receue a Rome le 5. Septembre, non plus que sa profession de foy faicte dans l'an: qu'il n'estoit raisonnable de faire valoir vne resignation apres la mort qui emporte la clause *quouis modo*, en vertu de laquelle Pierre le Ber eust peu leuer bulles *per obitum* en Chancellerie, d'un benefice situé en pays d'obeissance, ou iamaïs on ne donne deux prouisiôs par mort en Cour de Rome comme scauent tous practiciens de ladite Cour: & cela peut auoir esté la cause du nihil transeat, mesme attendu qu'il n'est point dit qu'il ayt esté mis a l'instance d'autruy: il a donc esté mis d'office.

Or soit que ce soit, de ce nihil transeat, il n'est point datté ny attesté auoir esté mis deuant la mort du feu Maistre Michel le Ber, au contraire il se voit clairement qu'il a esté mis long temps apres, & n'est point dit qu'il ayt esté mis a l'instance de Vallet: *ergo* le Ber n'a pas satisfait a l'intention du conseil, ny a l'arrest: & ny a point d'abus en ce desny dont il se puisse preualoir contre Vallet.

Le Ber se voyant pressé de la verité & de viues raisons par les escritures de Vallet, a confessé qu'il n'estoit point denommé audit nihil transeat: mais si veut il que le conseil croye que Vallet la mis: comme le pedant de Montagu qui ne pouuant respondre aux raisons puerilles de ses disciples qui argumentoyent cōtre luy que *Grammatica non erat ars*: se mit en cholere & a iurer par sa foy quelle estoit ars, & qu'ils le deuoient croire, & que autrement Iean des Espauls ne l'eust pas voulu escrire, nedire, & qu'il estoit trop homme de bien pour vouloir mentir.

Le Ber n'ayant donc tiré de Rome aucunes preuues contre Vallet, s'est reietté sur ses lettres missiues qu'il luy auoir escrit a la fin des moys de Iuillet & Septembre 1599. qui parlent d'un accrochement: & de remboursement de quelques frais.

A cela Vallet a respondu que telles lettres ont esté veues par le conseil deuant l'arrest interlocutoire, par lequel il a encores desiré d'autres preuues que celles que le Ber veut tirer desdites lettres qu'il a mal interpretees.

Vallet a interpreté par ses contredits lesdictes lettres, & monstre qu'il ne scauoit rien de cest accrochement que ce que le ber luy en auoit appris, *ed que*, apres la mort de son oncle, & comme cest accrochement venoit du defect au ber d'auoir enuoyé sa profession de foy à Rome faicte dans l'an, que encoresà present ledit ber ne represente, ains vne vielle profession de foy du commencement de l'an 1596. & quand aux frais dont Vallet parle dans ses missiues, il a respondu comme il est vray qu'il parloit des frais de la course expresse qu'il auoit fait faire à Rome pour faire prouuoir son frere François Vallet de la dicte Preuosté.

Le ber n'a donc satisfait a l'intention du conseil, & quand à son appel comme d'abus, Vallet a soustenu & soustient par les raisons susdites & autres escriptes au proces, qu'il ny a point d'abus, par ce que si on luy a refusé ses bulles à Rome: cela est prouenu de la faute, & quoy que ce soit n'est prouenu del'empeschement de Vallet.

Quant a l'instance de requeste ciuile obtenüe par Vallet contre vn arrest donné sur requeste presentee par le ber sans ouyr ledit Vallet, & par surprise, donnant faux a entendre que la procuracion a resigner de le ber defunct auoit esté admise à Ferrare le 5. Septembre 1598. les moyens de ladite requeste ciuile se verroit par la seule lecture d'icelle & par les pieces produictes au proces par le ber mesme qui se coupe la gorge de son propre cousteau apportant extraict de Rome que oncques la datte de Ferrare n'a esté estenduë, & quel'expeditiõ n'a esté demandee du viuant de le ber, & par consequent n'a esté empesché par Vallet: ains seulement a esté demandee le 27. Aoust 1599. apres la mort de le ber & sur vne procuracion sourance, & l'empeschement mis apres ledit iour 27 Aoust: non par Vallet qui oncques ny pensa.

La faulseté du fait articulé par le ber que le defunct son oncle auoit baillé ses trois procuracions a Lomedé banquier des le 29. Iuillet. & que sur icelles les dattes auoient esté prises le 5. Septembre ensuyuant 1598. à Ferrare, & les expéditions de la prebende de Paris & Prieuré de Ponts faictes dudit iour 5. Septēbre, & que sans l'empeschement de Vallet du viuant de son oncle quel'expedition de Vertou eust esté de mesme datte & expediee du viuāt de sondit oncle, ladite faulseté se recognoist au vray par les extraicts des registres dudit Lomedé, qui font foy comme il a esté dit au commencement: que la commission de ladite prebende & dudit prieuré ont esté donnees seulement le 22. Nouembre audit an, & les dattes prises à Rome le 16. Ianuier ensuyuant 1599. & que ledit Lomedé n'a esté chargé de la procuracion de Vertou, tellement que la datte de Ferrare a esté prise, sans puissance du resignant, sans mission de la procuracion par le banquier, sans reception d'icelle par le sollicitueur & sans quelle ayt esté registree ledit iour ny autre, sur les registres dudit sollicitueur de Rome ny du notaire, qui preste, le consens: c'est donc vne datte prise a plaisir, comme l'on en peut prendre tant qu'on veut: mais si elles ne sont ioustenuës de la procuratiõ, mission & reception d'icelle, & enregistrees du iour de la datte, elle sont nulles par les regles de Chancellerie & arreits des Courts souueraines, Edicts & ordonnances de nos Roys.



*puia que le p[ro]cur[ati]on a esté mis par le Bureau & allat s[ic] par
ordonn[ati]on par l[es] d[ic]tes ordonn[ati]ons de l[es] d[ic]tes ordonn[ati]ons et Cassat[ion]. Contre l[es] d[ic]tes
Contredat du xj. octob[re] 1599. pour l[es] quel p[ro]cur[ati]on d[ic]te
il luy pourroit faire*